

LISTOVI

GRAČANIČKI GLASNIK
časopis za kulturnu
historiju

Broj 42, godina XXI
novembar, 2016.
[str. 211-223]

© Monos 2016

Listovi gračaničkog kalendara od 14.5. do 8.11.2016. godine

Prof. dr. Omer Hamzić

14. 5. 2016.

Održan 19. festival dječjeg teatra u Gračanici

Festival zajednički, već skoro dvije decenije, organizaciji Centar za dramski odgoj iz Mostara i Bosanski kulturni centar u Gračanici. U okviru festivalskog programa ove godine predstavilo se ukupno deset dječjih predstava: *“Bit ću isti kao mama”* (KUD “Adem Alić” i Osnovna škola “Hasan Kikić”), *“Moja mama je klinceza”* (Gradsko kazalište Vitez), *“Čarobnjak iz Oza”* (Katolički školski centar “Sv. Franjo”, Tuzla), *“Uspavana Štrecilija”* (Sedma osnovna škola, Blažuj), *“Tri mačka i zakopano blago”* (Gradsko pozorište Živinice – U. G. Scena), *“Vane”* (Mostarski teatar mladih, 1974.), *“Imam svoje ja”* (Pozorište mladih “DIS” Banja Luka), *“Ničiji problem”* (Osnovna škola “Čengić Vila”, Sarajevo), *“Zimska basna”* (Osnovna škola Humci) i *“Ko je smjestio Vuku?”* (Prva osnovna škola Srebrenik). Odlukom dječjeg žirija (u sastavu: Dženana Gazibegović, Adnan Smajlović i Belma Nurkić), kao tri najbolje predstave izdvojene su: *“Imam svoje ja”*, *“Moja mama je klinceza”* i *“Čarobnjak iz Oza”*. Stručni žiri (u sastavu: Albina Junuzović, Edin Šaković i Nedžad Peljto) podijelio je nagrade i pohvale prema pojedinim kategorijama. Nagrada za najbolji scenski nastup pripala je Katoličkom školskom centru “Sveti Franjo” i predstavi *“Čarobnjak iz Oza”*; nagradu za ansambl igru osvojilo je Pozorište mladih “DIS” iz Banja Luke; nagrada za interakciju sa publikom je dodijeljena Mostarskom teatru mladih 1974, nagradu za primjenu novih teatarskih formi u dječjem teatru osvojila je Osnovna škola “Čengić Vila”, dok je Gradskom kazalištu Vitez žiri dodijelio nagradu za radost igre.

LISTOVI...

KUD-u "Adem Alić" i Osnovnoj školi "Hasan Kikić" je dodijeljena pohvala za obradu aktualne društvene teme, dok su pohvale za umjetničko-pedagoško u predstavi dobili Hajrudin Neradin iz "Sedme osnovne škole" Blažuj, te Kimeta Buševac, Edisa Muratović i Halima Fazlić iz "Prve osnovne škole" Srebrenik. (izvor: BKC, 14. 05. 2016.)

19. 5. 2016.

Uređenje izletišta Vis-Sijedi krš iznad Babića: asfaltiran poligon malih sportova, Općina Gračanica uložila 30.000 KM



Ulaganja se vrše s ciljem da izletišta Vis-Sijedi krš postane turistička destinacija, kako kažu "broj jedan" za odmor, sport i rekreaciju, za sve posjetioce sa općine Gračanica i šire. Na ovoj atraktivnoj lokaciji do sada je uređen teren za odbojku na pijesku, postavljene klupe i stolovi za odmor, uređeni travnati tereni i zaštitna ograda sa sjeverne strane tek asfaltiranog poligona, postavljene pristupne betonske stepenice na Sijedi krš, asfaltiran pristupni put do izletišta...

19. 5. 2016.

Otkriveno spomen-obilježje šehidima/poginulim borcima u Miričini

Ovim povodom, kod spomen obilježja, našli su se mnogobrojni mještani, članovi porodica poginulih, zvanične delegacije političkog i vjerskog života. Ponesen emocijama pred-

sjednik MZ Ervin Alić zahvalio se svima na učešću u izgradnji ovog simbola otpora agresiji na kojem su uklesana imena 16 poginulih boraca ove mjesne zajednice. Potom su govorili općinski načelnik Nusret Helić, Ervin Alić, glavni imam međžisa Gračanica, Smajo ef. Mustafić, Zikreta Karić, predsjednica Općinske organizacije porodica šehida i poginulih boraca općine Gračanica. U svom obraćanju općinski načelnik je istakao da se današnjim svečanim otkrivanjem ovog spomen obilježja ispunila još jedna obavezu prema članovima porodica poginulih boraca i šehida. Ovaj spomenik treba da bude opomena svima nama i mjesto okupljanja i podsjećanja na sve one čija se imena nalaze ispisana na njemu. Ovdje je i mjesto održavanja časova historije, mjesto koje će građani Miričine, Općine Gračanica i čitave BiH posjećivati i čuvati kao nešto što je predodređeno na vječnost, rekao je načelnik. Spomen obilježje izgrađeno je najviše sredstvima općine Gračanica, te mjesne zajednice i Kantonalne organizacije Porodica šehida i poginulih boraca, a uloženo je oko 50.000 KM.

20. 5. 2016.

Gračanica: "Marokanci" dobili novi asfalt (Ulica Taksima Šuše)



"Ovo je tipična mahala, gusto naseljena, mjesto koje je dalo mnogo boraca (...) Hvala vam za razumijevanje a nastojaćemo da ubrzo poboljšamo rasvjetu i sredimo okoliš oko spomenika" kazao je općinski načelnik Nusret Helić koji je simbolično i presjekao vrpču..." Vrijednost radova je oko 50 000 KM. (izvor: BKC, 21. 05. 2016.)

26. 5. 2016. Kompanija “Zeka – comerc” iz Gračanice otvorila Bau centar u Tuzli

...na lokaciji Šiški Brod (industrijska zona), pored dijela magistralnog puta od petlje Šiški Brod do Bolnice u Kreki. U gradnju ovog prodajnog objekta kompanija je investirala oko 5 miliona KM. Na desetak hiljada kvadratnih metara u moderno opremljenom Bau centru kupcima će biti na raspolaganju široka ponuda građevinskog materijala, alata, ugradbenih elementa, namještaja, bijele tehnike, robe za zabavu i rekreaciju. Na svečanom otvaranju, premijer Vlade TK Bego Gutic i gradonačelnik Tuzle, Jasmin Imamović su u svojim obraćanjima pohvalili firmu “Zeka komerc”, koja je uložila znatna finansijska sredstva za izgradnju tog objekta u Tuzli i zaposlila četrdeset radnika.

27. 5. 2016. Međunarodni dani kere i čipkarstva u Gračanici



Desetu godišnjicu svog postojanja i rada Udruženje žena “Gračaničko keranje”, koje je i osnovano s ciljem da promoviše tradiciju kere, kao “djelo” vrijednih ruku žena na ovim prostorima, obilježilo je dvodnevnom kulturnom manifestacijom, sa nizom zanimljivih sadržaja i programa. Između ostalog, u foajeu BKC-a otvorena je reprezentativna izložba kere i čipkarstva, na kojoj su svoje radove izložili gosti iz Švedske, Crne Gore, Turske, Hrvatske, Srbije i BiH. Vrijedi spomenuti i Okrugli stol, odnosno Međunarodnu konferenciju na temu “Kera/čipka kao nematerijalno kulturno nasljeđe: očuvanje, promocija i korištenje”. Manifestacija je otvorena činom

primopredaje potpuno renovirane Bosanke kuće, tzv. kuće Mare Popović u Gračanici (jedan od zaštićenih spomenika kulture) Udruženju “Gračaničko keranje” i njenim članicama na korištenje. Pred mnogobrojnim gostima i okupljenim građanima, ključeve objekta, na simboličan način, predsjednici Udruženja Azemini Ahmetbegović, predao je Nusret Helić, načelnik općine Gračanica, koja od početka podržava rad Udruženja.

27. 5. 2016. Asfaltirana dionica puta u naselju Bajići (Donja Orahovica)

Radi se o dionici kroz naselje, širine 4 i dužini 180 m. Vrijednost izvedenih radova je cca 20.000 KM, obezbijedenih iz Budžeta općine. Obilazeći ovu dionicu, općinski načelnik Nusret Helić je najavio da će se u skorije vrijeme, asfaltirati i dionica puta tzv. Makovci, kao i sportski tereni uz osnovnu školu u ovoj mjesnoj zajednici. (Izvor: BKC, 30. 5. 2016.)

30. 5. 2016. Općinsko vijeće Gračanica: 42. sjednica u znaku rješenja o smjeni i imenovanju članova Upravnog odbora JZU Dom zdravlja i izvještaju o radu i finansijskom poslovanju javnih komunalnih preduzeća “Vodovod” i “Komus”

...Donesena je i Odluka o dodjeli općinskih priznanja za ovu godinu. Od ostalih materijala koji su se našli na dnevnom redu, vrijedi spomenuti tri informacije i jednu inicijativu. Riječ je o informaciji o prikupljanju i odlaganju komunalnog otpada iz domaćinstava i privrednih subjekata, o zbrinjavanju napuštenih i izgubljenih životinja (pasa lualica) na području općine Gračanica i o stanju i popunjenosti izbjegličkih naselja na području općine Gračanica. Pokrenuta poslanička inicijativa odnosi se na izmjenu i dopunu

zakona o porezu na promet nepokretnosti i prava Tuzlanskog kantona

31. 5. 2016.

Asfaltirana ulica Ahmeta Šiljića u Gračanici

Kako je rečeno na završetku radova, to je jedna od ulica na gradskom području Gračanice sa najsavremenijom podzemnom infrastrukturom. Prethodnih godina duž te saobraćajnice ugrađen je toplovod, potom optički kablovi od strane BH Telekom, kao i infrastruktura kablovskih televizija, te konačno, izvršena rekonstrukcija i izgradnja fekalne i oborinske kanalizacije, čime su stvoreni preduslovi i za asfaltiranje ove ulice budžetskim sredstvima. U rekonstrukciju kanalizacije i asfaltiranje ove ulice općina je uložila 60.000,00 KM.

2. 6. 2016.

Dan Općine Gračanica, svečana akademija i dodjela općinskih priznanja

Nakon polaganja cvijeća na centralnom spomen obilježju, delegacije Općine Gračanica i bratske Općine Fleury Les Aubrais sa ambasadoricom Francuske u BiH Claire Bodony, kao i drugih brojnih delegacija, u velikoj sali BKC održana je svečana akademija na kojoj je Općinski načelnik Nusret Helić govorio o značaju datuma 2. juna, sa historijskog aspekta, zatim o specifičnostima Gračanice, o mnogobrojnim urađenim projektima te o planovima za naredni period. "Uvjeren sam da će Gračanica i Gračanlije znati svoj put u budućnost, a to je put demokratije, suživota, privatne inicijative, integracije Bosne i Hercegovine, put koji vodi u ekonomski i demokratski održivu zemlju i svjetliju budućnost.", istakao je između ostalog Općinski načelnik u svečanom referatu. Ambasadorica Francuske u BiH, Claire Bodony, te gradonačelnica Fleury Les Aubrais, čestitale su Dan

općine Gračanica i uputile lijepe želje građanima općine Gračanica. Potom je obavljena ceremonija dodjele tradicionalnih općinskih priznanja. Načelnik Helić je uručio *Zlatne plakete Općine Gračanica* Udruženju djece sa posebnim potrebama "Futura" i Časopisu za kulturnu historiju "Gračanički glasnik", a *Zlatne značke* Ameru Džindi, stručnom konsultantu za klizišta, Topčagić Almiru, policijskom službeniku Policijske uprave Gračanica i Drndić Mustafi, imamu iz Prijekog Brda, uručio je Predsjedavajući OV Edin Ibrisević.

2. 6. 2016.

Dan općine Gračanica: svečano otvorena rekonstruisana saobraćajnica u industrijskoj zoni

Nakon svečane akademije, na simboličnim presijecanjem vrpce, svečano je otvorena novoizgrađena saobraćajnica u industrijskoj zoni, koja povezuje magistralni put M4 i Sočkovački put. Ukupna vrijednost projekta je oko 200.000 KM, u kojem je MarketMakers (kojeg podržava Vlada Švicarske) učestvovao sa 165.235 KM, dok je ostali dio sredstava obezbijedila Općina Gračanica. Tokom rekonstrukcije izvršeno je izdizanje saobraćajnice na nivo viši za oko 1 m u odnosu na sadašnje stanje kako bi se smanjila opasnost od poplava kojima je ovo područje naročito podložno.

2. 6. 2016.

Dan općine Gračanica: svečano otvorenje nove fabrike Kompanije RPC "Superfos", svjetskog lidera u proizvodnji ambalaže za prehrambenu industriju, u čiji sastav je ušao i gračanički "Helioplast"

Od visokih gostiju, sećanosti je prisustvovala i Ambasadorica Francuske Claire Bodony, zatim predstavnici britanske ambasade, predstavnici RPC "Superfos" iz Velike Britanije, brojni poslovni partneri, predstavnici poli-

tičkog i društvenog života općine i Tuzlanskog kantona, općinski vijećnici i mnogobrojni građani, zaposleni radnici. Kompanija "Helioplast" osnovana je davne 1979. godine i od male porodične radionice prerasla je u veliku i uspješnu kompaniju, prepoznatljivu na međunarodnom tržištu. Nagrađivana je nebrojeno puta od strane EBRD-a, ali i drugih organizacija. Agencija FIPA svrstala je ovu kompaniju i njenu akviziciju među 3 najuspješnije akvizicije u 2014. godini u BiH. Poslovne novine uvrstile su kompaniju "Helioplast" među 100 najuspješnijih velikih preduzeća u BiH i to u kategorijama: neto dobit, investicije i izvoz. U periodu od 2013. – 2015. prosječan broj zaposlenih porastao je sa 110 na 145. Novim ulaganjima otvara se još dodatnih 20-30 novih radnih mjesta. Ova kompanija ima značajno učešće u izvozu BiH što potvrđuju njeni dosadašnji rezultati. U samo 2 godine, promet kompanije porastao je za skoro 70%, a izvoz za 40%. Učešće izvoza u ukupnom prihodu od prodaje u 2014. godini bilo je 75%, a 2015. čak 80%. Svojim uspjehom kompanija "Helioplast" zapažena je na regionalnom, ali i evropskom tržištu. U martu 2014. godine jedna od vodećih evropskih Grupacija RPC izvršila je akviziciju ove kompanije. Nakon samo godinu i 6 mjeseci odlučili su ići mnogo dalje u pogledu investiranja i uložiti u proširenje fabrike, a samim tim uložiti i u razvoj lokalne ali i državne privrede. Odbor Grupacije donio je odluku o investiranju 3,2 mil. (€) za izgradnju novog objekta u vidu proširenja postojeće fabrike u Gračanicima. Tako je postojeća fabrika proširena za dodatnih oko 3.000 m² proizvodnog i oko 5.000 m² skladišnog prostora, što zajedno sa postojećim objektom čini površinu od oko 12.000 m² proizvodno/skladišnog prostora. Prije samog čina svečanog otvaranju novog pogona, prisutne goste je pozdravio direktor Kompanije Suad Helić. Tom prilikom je o ovoj velikoj privrednoj investiciji istakao sljedeće: "Želio bih istaknuti da je riječ investiciji vrijednoj cca 6 mil. KM koja

se ostvarila u samo 2 godine nakon dolaska RPCa u BiH, što dovoljno govori o ozbiljnim namjerama ove Grupacije u našoj zemlji. Njeni planovi uključuju konstantan rast i razvoj, a proširenje nije posljednja investicija. Naime, u narednom periodu, najkasnije do kraja godine, planira se dodatno investirati u projekte zaštite od poplava i u dodatno proširenje proizvodnih kapaciteta. Sretni smo što ovom investicijom ne razvijamo samo interese naše kompanije nego i interes lokalne zajednice, kantona i države..."

2. 6. 2016.

Dan općine Gračanica: Izložba slika akademskog slikara Nijaza Omerovića

...otvorena je u galeriji Zavičajno muzejske zbirke u Gračanicima. Riječ je o retrospektivnoj izložbi, kojom Omerović obilježava 35 godina svog umjetničkog rada.

2. 6. 2016.

Dan općine Gračanica: Zlatna plaketa Općine "Gračaničkom glasniku"

To najviše općinsko priznanje dodijeljeno je ovom časopisu za rezultate ostvarene u oblasti kulture u proteklih dvadeset godina. U ime Redakcije, priznanje je primio, osnivač i glavni i odgovorni urednik Časopisa prof. dr. Omer Hamzić, koji se na zamolnicu iz Protokola Općine obratio i, u ime svih dobitnika, zahvalio na dodijeljenim priznanjima. Tom prilikom je za govornicom, između ostalog, rekao i sljedeće: "...U prvom redu želim da se zahvalim svima onima koji su nas predlagali, kao i svima onima koji su odlučivali o ovim priznanjima. Svjestan sam ozbiljnosti i velike društvene odgovornosti tog posla. Jer, što bi rekao veliki Stendal, od pogrešne kritike, jedino je opasnija pogrešna pohvala. Isto tako, svjestan sam da na našoj općini ima još mnogo pojedinaca i organizacija koji zaslužuju ovakva i slična priznanja. Iskreno se nadam

da će i oni u narednom periodu biti prepoznati. Nemojte mi zamjeriti i dozvolite mi da kao osnivač i glavni i odgovorni urednik časopisa za kulturnu historiju "Gračanički glasnik", sa ovog mjesta uputim posebnu zahvalnost svim svojim saradnicima, a njih je više od 300, koji su u proteklih 20 godina izdržali na ovom projektu. To je, kako neko reče, velika mega hronika Gračanice, od oko 7000 stranica teksta u printanoj i elektronskoj formi, koja odavno ima svoje mjesto u svim značajnijim bibliotekama u BiH, vašigtonskoj biblioteci i međunarodnoj bibliografskoj bazi CEEOL u Frankfurtu, te na brojnim domaćim fakultetima i učilištima. To je, zapravo jedinstvena kolekcija od 40 knjiga, svaka obima od 180 do 200 stranica, koje na najbolji način promovisu kulturne i civilizacijske vrijednosti naše Gračanice i naše Bosne i Hercegovine. I da budem neskroman, malo je gradova kod nas koji su tako sistematski istraženi i opisani. Zato bih želio da svaka čaršija u Bosni i Hercegovini ima svoj "Gračanički glasnik". U to ime, zahvaljujem se na kontinuiranoj podršci Općine Gračanica, u prvom redu aktuelnog načelnika Nusreta Helića, ali i dragocjenoj pomoći nekoliko gračaničkih privrednika, koji stoje iza nas i materijalno nas pomažu, bez obzira što znaju da od toga neće imati neku posebnu reklamu ili komercijalnu korist za svoje firme. Oni su prepoznali općedruštvenu misiju Časopisa kao kulturnog "proizvoda", koji ostaje na raspolaganju svima nama i generacijama koje dolaze iza nas..."

3. 6. 2016.

Promocija 41. broja "Gračaničkog glasnika"

...obavljena je u prostorijama Gradske biblioteke u Gračanici.. Sadržaj novog broja je predstavio prof. dr. Omer Hamzić, glavni i odgovorni urednik Časopisa, a prisutnima su se obratili i mr. sc. Fatima Bećarević, autorica priloga o dramskim aktivnostima Udruženja

"Anea MG", te dipl. ing. Izet Spahić, autor priloga o tradicionalnom narodnom kalendaru gračaničkog kraja i ovog dijela Bosne.

3. 6. 2016.

Ozvaničen početak gradnje nove zgrade Osnovne škole Stjepan Polje

Ovim povodom, uz veći broj građana, nastavnika i učenika škole bilo je prisutno i nekoliko visokih gostiju, među kojima i ministar obrazovanja, nauke, kulture i sporta Tuzlanskog kantona, Zlatan Muratović, Općinski načelnik Nusret Helić, predsjedavajući Općinskog vijeća Edin Ibrišević, te nekoliko privrednika iz Stjepan Polja, koji su i pokrenuli ovu inicijativu, obećavši snažnu finansijsku podršku projektu. Inicijativu je podržala i Vlada TK kao i Općina Gračanica. Prema obećanjima, koja su data ovom prigodom, škola bi trebalo da bude završena do početka školske 2016/2017 godine.

10. 6. 2016.

Asfaltiran put "Makovci" u Donjoj Orahovici

Kao što je i obećao, načelnik Općine Gračanica Nusret Helić je, uz skromnu svečanost, presijecanjem vrpce, predao na upotrebu dionicu puta "Makovci" kroz Donju Orahovicu u dužini od 750 metara i najavio asfaltiranje sportskih poligona uz Osnovnu školu Vrijednost radova na ovoj dionici puta je cca 72.000 KM a sva sredstva je obezbijedila Općina Gračanica. Prošle godine je asfaltirana prva dionica, tako da je ukupna dužina puta za "Makovce" 1.400 m.

12. 6. 2016.

Završeno asfaltiranje glavne saobraćajnice u naselju Bahići

Put širine 5, a dužine 450 metara na Bahićima svečanim presijecanjem vrpce otvorili su općinski načelnik Nusret Helić i "Zlatni lji-

ljan” iz ovog naselja Husejn Šakušić. Općina je uložila oko 50.000 KM. Ovim povodom upriličeno je i narodno veselje, na kojem je Helić najavio spajanje ove dionice sa naseljem Javor i Mustafići.

30. 6. 2016.

Općinsko vijeće: 43. sjednica, u znaku rebalansa Budžeta, učeničkih i studentskih stipendija i nekoliko informacija

Obrazlažući Rebalans, kao njegov predlagač, općinski načelnik je istakao: “Problem kod budžeta je smanjenje izvornih prihoda (bilo poreznih ili neporeznih), jer oni nemaju namjenski karakter nego se iz njih finansira većina izdataka. Nama se upravo to desilo, jer je jednostavno došla nova smjernica kroz koju se prihod po osnovu PDV-a umanjuje za više od 440.000 KM. Istovremeno se moraju povećati neki izdaci koji su rezultat stvarnih potreba ili se trebaju završiti neki projekat, čija je vrijednost veća od planirane, a isti se ne može na pola završiti (primjer: javna rasvjeta u gradu, sprat zgrade Općine i slično). Porezni prihodi su u odnosu na plan manji za nešto više od 310.000 KM, a najveće smanjenje se odnosi na prihode po osnovu PDV-a 442.150 KM. Porez na dohodak je veći za blizu 120.000 KM “. Što se tiče učeničkih i studentskih stipendija, ove godine su u planu 94 stipendije. Od izvještaja i informacija koje su vijećnici manje-više usvojili bez ikakve rasprave, vrijedi spomenuti Informaciju o stanju okolice na Općini Gračanica sa osvrtom na kantonalni plan zaštite okolice i kantonalni plan upravljanja otpadom, Informaciju o stanju javne rasvjete u gradu i ostalim mjesnim zajednicama na području Općine Gračanica sa osvrtom na potrošnju električne energije i Informaciju o statusu projekta “Poboljšanje vodosnabdijevanja i proširenje sistema kanalizacione mreže na području Općine Gračanica” kandidovanog pri Evropskoj

investicionoj banci, o čemu nije bilo nikakve rasprave. (izvor: pres. Općine Gračanica)

1. 7. 2016.

“Stop trovanju Spreče...”

Povodom ko zna kojeg po redu trovanja i pomora ribe u toj rijeci, nakon izraženog nezadovoljstva i protesta brojnih građana i udruženja, u prvom redu Sportsko-ribolovnog društva “Drijenča” i Udruženja poljoprivrednika, Općinski načelnik Nusret Helić je održao pres konferenciju na kojoj je između ostalog poručio: Zagađivanje rijeke Spreče nije jedini problem sa kojim se Općina suočava. Tu je zagađenje tla u dolini ove rijeke kao i plavljenje nizvodno od brane jezera Modrac. Gračanica je više nego ikada odlučna da kaže “Stop trovanju Spreče” Osim načelnika, na konferenciju su govorili još i Predsjedavajući Općinskog vijeća Gračanica Edin Ibrišević, sekretar Sportsko-ribolovnog društva “Drijenča” Osman Hodžić i Predsjednica udruženja poljoprivrednika Abida Jahić . “Više godina traje borba sa ovim problemom što dokazuju mnogobrojni dopisi, protestna pisma i prijave protiv odgovornih, no u svakom slučaju presudio je profit”, rekao je predsjedavajući OV Gračanica Edin Ibrišević. Sekretar Sportsko-ribolovnog društva “Drijenča” Osman Hodžić je istakao da su ribari uvijek prvi koji osjete razmjere ekološke katastrofe. “Naša borba traje godinama jer se bojimo budućnosti i onoga šta ćemo ostaviti mladim generacijama.” Načelnik Općine i predsjedavajući Općinskog vijeća obećali su da će se lokalne vlasti boriti protiv ove nepravde prema stanovništvu Gračanice. Traži se od Vlade TK i Federacije BiH, te resornih ministarstava i nadležnih inspekcija da se u roku od 30 dana utvrde počinioci i poduzmu odgovarajuće mjere da već jednom prestane trovanje građana Gračanice. “U protivnom, poduzet ćemo i druge mjere uključujući organizovanje protesta svih građana...” poručili su učesnici ovog skupa. I nakon ovog, ko

zna kojeg po redu protesta, nažalost, proteći će još mnogo prljave vode Sprečom dok se “stvari ne razbistre”

8. 7. 2016. Deseti festival folklor a i sevdaha “Lukavica 2016.”

Na festivalu su učestvoval e folklorne grupe iz Turske, Bugarske, Srbije, Hrvatske, Indije i BiH. Festival je održan na ljetnoj pozornici u Lukavici. (Izvor BKC, 08. 07. 2016.)

29. 7. 2016. Otvorenje puta u naselju Čozalovo Brdo (Šk ahovica)

Dužina puta je 1.700 metara, cijelom dužinom puta su uređene bankine, a na jednom dijelu je izgrađen i potporni zid, dužine 30 m, radi zaštite od eventualne opasnosti od klizišta. Ukupna vrijednost projekta iznosi 100.000 KM, Općina Gračanica je obezbijedila 70.000 KM, a ostalih 30.000 KM su prikupili mještani.

7. 8. 2016. Obilježena 22. godišnjica bitke na Visu

Obilježavanje je započeto dolaskom izviđača i građana, učesnika “Marša linijom odbrane” iz pravca Malešića te njihovim postrojavanjem pred spomen-obilježjem na Visu. Kao i ranijih godina prisustvoval e su porodice poginulih boraca, preživjeli učesnici bitke, ratni komandanti, predstavnici i članovi boračkih udruženja sa područja općine Gračanica, imami Medžlisa Islamske zajednice Gračanica, izviđački odredi “Vrba” iz Doboj Istoka i “Lukavica”, te predstavnici lokalne vlasti i veliki broj građana općine Gračanica. Čas historije održao je ratni komandant Ibrahim Nurikić, koji je istakao da je Vis bio i ostao gračanički simbol otpora fašizmu, historijskog i herojskog značaja uprkos proteklom

vremenu. O važnosti ove spomen-lokacije u svom obraćanju govorio je i općinski načelnik Nusret Helić. U programu obilježavanja godišnjice bitke učestvovali su i imami Medžlisa IZ Gračanica, koji su proučili dovu palim borcima. Skup su uveličali i članovi udruženja mladih “Sijedi krš” Babići i “Izvor” Šk ahovica. U okviru obilježavanja upriličeno je i zvanično otvorenje sportskog poligona Vis, koji će ovo izletiš te učiniti još privlačnijim za zaljubljenike u prirodu, sport, ali i za porodična druženja. Kulturni dio programa započeo je smotrom folklor a “Vis 2016” učesnika sa područja općine Gračanica, Doboj Istok, Doboj, Srebrenik e te sa područja Brčko distrikta. Narodno veselje na kojem je prisustvovalo nekoliko hiljada građana potrajalo je do kasno u noć. (pres Općine Gračanica)

10. 8. 2016. Miričina: otvoren fudbalski stadion “Lugovi”

U prisustvu brojne publike, stadion je otvoren prijateljskom utakmicom između Nogometnog kluba “Lokomotiva” Miričina i Nogometnog kluba “Bratstvo” Gračanica. Time su stvoreni bolji uslovi za razvoj sporta u ovoj mjesnoj zajednici.

28. 8. 2016. Selo Buk dobilo asfaltni put i poligon za male sportove

Radi se o najudaljenijoj mjesnoj zajednici od centra općine u kojoj su mještani ispoljili veliki aktivizam i volju da uslove života u svom selu učine što boljim. Uz skromnu svečanost, kojoj je prisustvoval o i općinski načelnik, izvršeno je puštanje u saobraćaj novoasfaltiranog puta u dužini od 1.300 metara i poligona za male sportove u centru sela. Vrijednost svih navedenih projekata iznosi cca 250.000 KM. Mještani su uzeli učešće sa 20% svojih novčanih sredstava. Obračujući se velikom broju mještana, općinski načelnik Nusret

Helić je istakao da zasluge za realizaciju ovih projekta pripadaju prije svega složnim mještanima, čiji društveni aktivizam i zalaganje za dobrobit svog naselja mogu poslužiti kao lijep primjer. Hajrudin Hevešević, predsjednik Vijeća MZ Buk, zahvalio se Načelniku na učešću u realizaciji ovih projekata koji su od izuzetne važnosti za ovu mjesnu zajednicu. (pres općine Gračanica)

31. 8. 2016.

Općinsko vijeće Gračanica: 44. sjednica, bez teških tema

Bez veće rasprave vijećnici su skoro rutinski usvojili nekoliko rješenja i izvještaja (među kojima izdvajamo izvještaj o realizaciji lokalnog akcionog plana zaštite životne sredine općine gračanica (leap) za 2015.godinu), te dvije informacije: o stanju putne infrastrukture i o aktuelnim privrednim kretanjima na općini Gračanica u 2015/2016.godini.

1. 9. 2016.

Dan 111/221. gračaničke brigade prvi put obilježen kao datum od općinskog značaja

Prema Odluci Općinskog vijeća o obilježavanju datuma od općinskog značaja, još prije desetak godina ustanovljena su četiri takva datuma: 7. april, Dan oslobođenja Gračanice u Drugom svjetskom ratu, 25. maj Dan odbrane Gračanice, 2. juni, Dan općine i 8. avgust, Dan pobjede na Visu. Na inicijativu boračkih organizacija, Općinsko vijeće je još prethodne godine usvojilo Odluku o izmjeni i dopuni spomenute odluke, kojom se, kao datum od općinskog značaja, pored dotadašnja četiri, uvodi i Dan 111/221 gračaničke brigade. Sticajem okolnosti taj datum prošle godine nije se obilježio, pa je ove godine po prvi puta upriličeno njegovo obilježavanje "u tom rangu". Nosilac organizacije bila je Općina Gračanica u saradnji sa Koordinacijom boračkih udruženja. Svečanosti su

počele polaganjem cvijeća na Centralnom spomen-obilježju Odbrambeno-oslobodilačkog rata 1992-1995.godina, te na spomen obilježja u Gornjoj Orahovici, Miričini, Lukavici, Pribavi, Lohinji te na spomen obilježje Vis i Zečev Gaj. U organizaciji Medžlisa IZ Gračanica, proučen je tevhid i hatma-dova šehidima u Bijeloj džamiji u Gračanici. Nakon odavanja počasti poginulim borcima, u Bosanskom kulturnom centru održana je svečana akademija, na kojoj se prisutnima obratio Općinski načelnik Nusret Helić, podsjećajući na važnost obilježavanja novouspostavljenog općinskog praznika koji je veoma bitan i dobro poznat datum iz naše novije historije. Iz njegovog izlaganja izdvajamo sljedeće akcente: "111. Gračanička brigada je branila i odbranila gračanički kraj, ali i dala krupan doprinos odbrani naše zemlje. Preko 5.000 stanovnika naše općine i ovog prostora prošlo je kroz redove 111. gračaničke brigade. Ponosan sam što sam i lično bio jedan od njih – kao što, vjerujem da svaki drugi borac i pripadnik brigade osjeća jednaku vrstu ponosa na taj period svog života. Prošlo je već dosta vremena, udaljili smo se od tih ratnih dana, ali nažalost – udaljili smo se možda i previše jedni od drugih. Iskreno se nadam da će ovakve prigode i manifestacije biti poticaj da se okupljamo, družimo, obnavljamo stare veze, jačamo solidarnost i učvršćujemo jedinstvo, ali i gajimo sjećanje na ono što ni po koju cijenu ne smijemo zaboraviti". Prigodnim referatom prisutnima se obratio i prvi komandant Tarik Nuhanović, koji je govorio o slavnoj 111. gračaničkoj brigadi, njenom formiranju i ratnom predsjedništvu. U kulturno-umjetničkom programu učestvovali su gradski hor "Arabeske" i Ibrahim Jukan.

14. 9. 2016.

Otvorena novosagrađena škola u Stjepan Polju

Umjesto stare, trošne i neuslovne (montažne) zgrade, koja je srušena krajem prošle školske

godine, samo za tri i po mjeseca na istom mjestu sagrađena je nova dvospratnica sa 1300 kvadratnih metara korisnog prostora, opremljena savremenim namještajem i školskom opremom. U ovom prostoru nastavu će pohađati od početka ove školske godine blizu 400 učenika. Vrijednost investicije je oko milion KM, a većinu sredstava su obezbijedili mještani i privrednici Stjepan Polja, među kojima posebne pohvale zaslužuje Hadži Vahid Brkić, jedan od glavnih pokretača ove akcije. U akciju se uključilo i Ministarstvo obrazovanja TK i Općina Gračanica. Ovo je pozitivan primjer zdrave saradnje mještana, privrednika i lokalne i kantonalne vlasti, isticali su mnogi visoki gosti, iz općine Gračanica i Vlade Tuzlanskog kantona, koji su prisustvovali svečanosti otvaranja škole. (Izvor: BKC)

20. 9. 2016.

Gračanlija Dr.sc. Izet Mašić, redovni profesor Medicinskog fakulteta Univerziteta u Sarajevu, sin poznatog gračaničkog pjesnika, filozofa i tarihopisca Muhameda Mašića, izabran za počasnog člana Američkog koledža medicinske informatike (ACMI).

Vijeće Europske federacije za medicinsku informatiku (EFMI) imenovalo je profesora Mašića za počasnog člana EFMI za životno djelo i svoj dugogodišnji doprinos na području medicinske informatike. Izet Mašić je pionir ove naučne discipline u BiH i prvi ljekar iz zemalja bivše Jugoslavije koji je magistrirao i doktorirao na toj naučnoj disciplini. Nakon dobijanja tog priznanja i dvije objavljene, važne, svjetski poznate knjige–“Doprinosi za povijest Medicinske informatike” (2014.) i “Biografski leksikon Medicinske informatike” (2016.), dr. Mašić je dobio još jedno priznanje–postao je počasni član Američkog koledža medicinske informatike

(ACMI), koje kotira kao jedno od najuglednijih naučnih udruženja na području biomedicinske informatike. Članovi ovog udruženja su pioniri medicinske informatike i dobitnici Nobelove nagrade. Izet Mašić je postao prvi naučnik iz bivših socijalističkih zemalja, koji je postao član tog pretižnog američkog udruženja. Inače, prof. dr. Izet Mašić je jedan od najrecentnijih naučnih radnika u BiH, autor je na desetine knjiga, udžbenika i priručnika, te stotine stručnih i naučnih radova iz oblasti medicinske informatike i historije medicine, učesnik na mnogobrojnim domaćim i međunarodnim naučnim skupovima, glavni je i odgovorni urednik je časopisa “Medicinski arhiv”, “Materia Socio Medica” i “Acta Informatica Medica”, član redakcija mnogih naučnih i stručnih publikacija, među kojima i Časopisa “Gračanički glasnik”

21. 9. 2016.

Završena rekonstrukcija fiskulturne sale Osnovne škole “Hasan Kikić” u Gračanici

Ideja za rekonstrukciju sale, koja je izgrađena još davne 1980. godine, potekla je kroz Projekat “Vratimo djecu u sportske sale”. Podršku je, početkom ove godine dalo Vijeće roditelja i menadžment škole, uključili su se i privrednici, roditelji, učenici i osoblje škole, te općina Gračanica i Vlada TK. U kompletnu rekonstrukciju objekta, sa pratećim prostorom i mokrim čvorovima uloženo je oko 180.000 KM. Povodom završetka rekonstrukcije, održana je skromna svečanost, kojoj su prisustvovali najviši predstavnici općine Gračanica, ministri Vlade TK, te dr. sc. Nizama Salihfendić, predsjednica Udruženja “Polifonija”, lady Miloška Not počasna građanka Gračanice, koja je dala veliki doprinos u izgradnji Muzičke škole u Gračanici, brojni roditelji, učenici, privrednici, te ambasador Ujedinjenog kraljevstva, Edward Ferguson.

30. 9. 2016. **Održana 45. sjednica Općinskog vijeća Gračanica, posljednja u ovom mandatu**

U radnom dijelu sjednice usvojena je odluka o izgradnji spomen-obilježja poginulim borcima i šehidima u odbrambeno-oslobodilačkom ratu 1992. – 1995. u MZ Babići, a potom je uslijedilo protokolarno zahvaljivanje i pohvaljivanje “samih sebe”. Prvo je to učinio dosadašnji predsjedavajući Općinskog vijeća Edin Ibrišević (rekao da je Vijeće održalo 45 redovnih i nekoliko vanrednih sjednica), iza njega predsjednici najjačih vijećničkih klubova: Nihad Krajinović (SDP), Rahim Gadžić (SDA), te zamjenik predsjedavajućeg Općinskog vijeća – Sead Gazibegović. Na kraju se vijećnicima obratio i općinski načelnik Nusret Helić, zahvalio im na fer i korektnoj suradnji u proteklom mandatu i u to ime uručio im prigodne poklone “za spomenu i dugo sjećanje”.

3. 10. 2016. **Održani 7. po redu poslijeratni općinski (lokalni izbori)**

Izuzev problema i incidenata koji su zabilježeni u Stocu i Srebrenici i ovogodišnji izbori protekli su mirno i bez većih problema. U biračke spiskove na nivou BiH upisano je 3.178.720 birača, koji su imali priliku da na 5.062 biračka mjesta, između 119 prijavljenih političkih subjekata (političkih stranaka, koalicija i samostalnih kandidata glasaju za “najbolje”... Što neko napisa, kasnije nek se ne kaju (misli se i na one koji su izašli i na one koji nisu izašli na glasanje). Na području općine Gračanica registrovano je 42.286 birača, koji su glasali na 63 biračka mjesta. Za načelničko mjesto, u utрку je ušlo pet kandidata: Nusret Helić, dosadašnji načelnik (SDP), Esad Tursunović (SDA), Amir Hasićević (Naša stranka), Senad Kadić, Demokratska fronta i Elvis Bektić (BPS). Za 30 mjesta u Općinskom vijeću Gračanica svoje kandidat-

ske liste istaklo je čak 13 političkih stranaka: SDP, SDA, Naša stranka, Stranka za BiH, Socijaldemokratska unija, BPS, Demokratska fronta, BOS, SBB, Liberalno-demokratska stranka, Stranka demokratske aktivnosti, Demokratska stranka invalida BiH i Socijalistička partija. “Izborni dan” na području općine protekao je takođe bez većih problema.

8. 10. 2016. **U Stjepan Polju održana 7. Izložba stočarstva Gračanica-Doboj Istok 2016.**

Organizator izložbe je i ove godine ZZ “Gračanica” u partnerstvu sa Općinama Gračanica i Doboj Istok i uz neposrednu pomoć Udruženja poljoprivrednika “Dolina rijeke Spreče Doboj Istok”, Udruženje poljoprivrednika, poljoprivrednih proizvođača i tehničara Gračanica i Udruženje peradara TK. Na izložbi je učestvovalo 38 izlagača muznih grla, priplodnih junica, teladi, tovnih junadi, 6 izlagača konja i 8 izlagača ovaca, a izložbu su uveličali i proizvođači meda, i ostalih autohtonih proizvoda sa ovog područja. Opća ocjena je da je izložba ispunila svoje glavne ciljeve: afirmacija poljoprivredne proizvodnje uspostavu poslovnih kontakata, stvaranje boljeg ambijenta za razvoj poljoprivrede, očuvanje tradicije sa naših područja i pokretanje agroturizma. Ceremoniji otvaranja prisustvovali su brojni gosti iz društvenog i političkog života spomenute dvije općine i iz Vlade TK (Izvor: BKC)

17. 10. 2016. **Gračaničke termalne vode: kupanje tokom cijele godine**

Ovaj izuzetno značajan prirodni resurs ne samo za općinu Gračanica, već i za Bosnu i Hercegovinu, sa obiljem tople i ljekovite vode, kao banjisko-rekreativni centar sa otvorenim bazenima, mogao se do sada koristiti samo u toku ljetne sezone. Na radost mnogih korisnika ovog resursa, kako mnogi kažu “božje

blagodeti”, menadžment ove firme izvršio je rekonstrukciju i dogradnju Centra, znatno obogativši svoje sadržaje i ponudu. Osim dva poluzatvorena bazena, toplih tunela i omogućenog zimskog kupanja, gračaničke “Terme” od ove jeseni u ponudi donose i dio spa-programa, popularnu finsku saunu. Besir Delić, direktor i suvlasnik “Terma” izjavio je prilikom otvaranja sezone “Jesen–zima” da kao društveno odgovorna firma “Terme” žele omogućiti korisnicima banjanje i rekreiranje tokom cijele godine. Za rekonstrukciju kupališnog kompleksa ove godine je utrošeno 500 hiljada KM. Sudeći po rangu visokih gostiju koji su “nazočili ovom činu”, gračaničke “Terme” bi se mogle nadati i nekoj konkretnijoj podršci investitora. (Izvor: BKC)

17.10.2016.

Nakon sanacije klizišta u zoni starog puta i Hadžine vode na Korća Hanu, Gračanica dobila još jedan (novi – stari) izlaz na magistralnu cestu Doboj Tuzla

Samo se stariji žitelji ovog kraja sjećaju starog makadamskog puta Doboj Tuzla, koji je “ispod Gračanice” prolazio sadašnjom trasom asfaltnog puta koji vodi od Pribave kroz Hajdarovac (iznad “Fortune”), zatim nastavlja pored “Jadrine”, izlazi na raskrsnicu Korića Han i spušta se blagom nizbrdicom prema Hadžinoj vodi i dalje – na magistralni put. Upravo na tom izlazu put je bio potpuno zapušten, a usljed poplava i klizišta 1914. godine i potpuno prekinut. Sanaciji ovog terena, uključujući i temeljnu rekonstrukciju i asfaltiranje stare trase puta u dužini od 800 metara, pristupilo se nakon obezbjeđenja sredstava za realizaciju druge faze projekta “Hitni oporavak od poplava” (FERP), koji finansijski prati Svjetska banka, u okviru kojeg se našao i “Korića han”. Da bi se definitivno riješio problem poplava i klizišta u zoni Korća Hana, za kratko vrijeme (izvođač radova bio je gračanički “Roading”) izgrađena je

drenažna mreža i oborinska kanalizacija (u cilju stabilizacije klizišta), te sanirana i asfaltirana dionica stare trase puta u dužini od 800 metara. Ovim zahvatima omogućava se znatno brža odvodnja sa površinskih dijelova puta, onemogućava prodor vode, odnosno, štiti putna konstrukciju, a time i padinu uz saobraćajnicu, čime se obezbjeđuje stabilnost cijelog poteza kroz duži vremenski period. Kako je rekao općinski načelnik Nusret Helić, prilikom otvaranja te saobraćajnice, ukupna vrijednost radova iznosi 200.000 KM, a cjelokupan iznos je obezbijedila Svjetska banka u okviru spomenutog projekta “Hitni oporavak od poplava”. (Izvor: BKC)


8. 11. 2016.

Umro profesor Mehmed Nurikić

Rođen je u Odžaku 1947. godine, gdje mu je otac, inače, porijeklom iz ugledne porodice iz sela Vranovići (općina Gračanica), bio na službi mjesnog imama u tom mjestu. Nakon osnovne i srednje škole, završio je Filozofski fakultet u Sarajevu, a radni vijek proveo u gračaničkoj gimnaziji, gdje je godinama predavao srpskohrvatski/bosanski jezik i književnost. Pamte ga brojne generacije gračaničkih srednjoškolaca, ljubitelja lijepje riječi i pozorišta. Bio je omiljen među učenicima i kolegama, ostrim umom, smislom za humor, saburom i lijepom riječju otkrivao je nove svjetove budućim ljubiteljima književnosti i umjetnosti, učio ih je da razmišljaju, sagledaju, imaju svoje stavove i budu prije svega dobri ljudi. Dao je značajan doprinos u razvoju kulture, književnosti i umjetnosti Gračanice, pisao je recenzije, uređivao knjige i literarne radove. U vrijeme dok su vannastavne aktivnosti bile vrednovane na nivou kantona, sa svojim učenicima osvajao je prva mjesta u kategoriji dramske umjetnosti. U toku agresije na BiH (1992.–1995.) bio je urednik ratnog lokalnog lista “Biljeg vremena”, koji je ostao kao značajno svjedočanstvo o ratnim prilikama gračaničkog kraja. Nakon penzionisanja

aktivno je sudjelovao u realizaciji pozorišnih predstava, promocija knjiga i književnih večeri u okviru Udruženja mladih ANEA Gračanica. U saradnji sa kolegicom Fatimom Bećarević, režirao je četiri pozorišne predstave “Bujrum” “Opća bolnica” “Ne igraj na Engleze” i “Izbiračica” koje su izvođene više puta u Gračanici, a predstava “Ne igraj na Engleze” izvođena je u Žepču, Prnjavoru i Srebrenici.

Između ostalih aktivnosti, bio je jedan od poštovalaca i saradnika “Gračaničkog glasnika”. Njegov posljednji susret sa ovim časopisom bio je na promociji 39. broja, 3. 6. 2015., kada je nadahnuto govorio o životu i djelu Muse Ćazima Ćatića, povodom stote godišnjice smrti tog velikog bosanskohercegovačkog pjesnika.



Fuad ARIFHODŽIĆ, Čaršija zimi III, akvarel, 2x46cm, fotografisala: Dragana Antonić



Fuad ARIFHODŽIĆ, Briga, 18x12cm, fotografisala: Dragana Antonić